

平湖縣志卷十二

四品銜升用同知平湖縣知縣彭潤章修

宦績

文秩 武秩

文秩 按程志所採名宦最夥朱志以下載筆綦嚴四志之修僅及前明之半茲考諸府志訪諸輿評謹補列二十餘傳以誌甘棠之愛云

明

徐韶江西豐城人監生正統甲子知縣事工部尚書石璞奏韶罷

輒不能任事去官景泰庚午部民保韶廉勤有為鎮守副都御史

軒輓以聞遂復之

李翥北直東光人監生成化間知縣事時周家涇并獨山海塘衝

塌鹹水浸入民田翥奏乞將在官折贖納米銀計工修築從之

程志

平湖縣志

卷十二

宦績

文秩

參朱志

梅清字本潔四川大足人監生成化間任管糧丞衣粗食糲一介

不苟催征餘日佐其長以廣治化當道知其廉毅檄按他邑疑獄

無不明允檄董海塘稽覈勸勞有方工速而固嘗樂近文士不廢

吟咏九載考滿乞歸祀名宦

府柳志 參朱志

郝文傑字士英山西陽曲人舉人成化中知縣事為政勤激勸擇

三老子弟中孝弟篤行者旌勵之里閭諸不軌及胥吏執法咸裁

以律恩威並協遷知高郵州

府劉志 參程志

林光字緝熙號南川廣東東莞人成化乙酉舉人以甲辰會試乙

榜授教諭光生而清癯好學不倦師事陳獻章築室欖山往來問

學者二十年巡按朱英勸之仕光報曰夫人幼而習之於小學必

求所以事上長而進之於大學必求所以治下善學者不汲汲於  
施為甯學成而不用未有不咸而苟用者也尋以母強之出上敦  
教化養廉耻疏言甚懇切巡視彭韶廉其賢待以賓師禮丙午主  
考福建宏治己酉又主湖廣試是年總修浙藩憲廟實錄辛亥修  
嘉興府志壬子同考順天凡三校文多得名士時服其藻鑑薦卓  
異陞兗州府教授祀名宦程志參朱志 王志云宏治初嘉興知府柳玟修府志聘光主之於邑事尤詳  
贍精核實為法志嚆矢按府圖記光居九年遷國子博士終襄府長史與縣志小異  
熊卓字士舊志作志誤選江西豐城人宏治丙辰進士知縣事剛毅明  
敏貴勢無敢撓之尤廉潔自守為時良吏擢御史祀名宦府圖記豐城  
縣志卓十歲能文為御史時陳時政得失奉敕勞軍革乾沒之弊按都督郭英賊罪論如法雖權貴莫之撓出按廣東墨吏望風遁時逆瑾權傾中外卓獨抗節不屈遂誣以奸黨勒令致仕素以詩名與李獻吉何仲默相頡頏云

平湖縣志

卷三

宦績 文秩

二

郭天錫字福山山東登州人舉人正德末知縣事清謹有惠愛興  
利除害不畏強禦不阿上官風力甚著遷知徐州府圖記參程志

周仕字用賓號草岡江西廬陵人嘉靖壬辰進士知縣事剛正嚴

明介然有守詞無妄受幽隱畢徹以是少訟尤重學校母終於署

徒步哀號觀者咸為墮淚後令句容陞工部主事祀名宦府劉志參朱志

黎循典字成五號兩峯湖廣華容人嘉靖甲午由舉人知縣事興

學校省刑罰均徭稅催科不擾和易近民擢御史府劉志

戴鍊字成之號性菴南直婺源人舉人嘉靖中任教諭有文學聲

又能以古道率人崇尚志節振起生徒貧而好學者分俸賜之捐

資以葺學廡稱為良師陞知甯州府圖記

蔡鳳字九苞江西南昌人吏員嘉靖中任縣丞永蘗自厲任事果

敢篤實絕無矯激近名之私民頌其德秩滿乞休

府圖記 參程志

張煌字用韜號水東福建南安人進士嘉靖己亥知縣事為政本

篤實不為矯激而邑中刁黠噤不敢動訟者得一言輒解去陞工

部主事

程志

陳朝紀號石亭廣東南海人貢生嘉靖中由歙縣訓導遷教諭直

已守道終始一節工詩賦常有天下可人惟雪色客中知己只梅

花之句歲祲捐俸周諸生急老而致仕門人為刻冷香留稿以志

思

府劉志 參程志

曾曙字暘谷廣西全州人舉人嘉靖甲辰知縣事性介不妄取與

剔蠹除奸與民休息是歲五月不雨秋大饑殍殣相望力請當路

出粟賑之復廣設粥廠以食饑者會催科甚急毅然曰吾官可罷

平湖縣志

卷士

宦績

文秩

三

民不可毒有逋稅者咸使歸業弗之繫民免轉徙然竟以緩徵罷

去泣送者數千人祀名宦

府劉志 參程志

李儔字仙臺山東長清人嘉靖甲辰進士知縣事勵精有為立法

尚嚴明先是田賦不均輕重失實儔始為均之民稅得舒

程志

楊挺高字叔謙號維齋山東金鄉人進士嘉靖庚戌知縣事性狷

介袍履皆布素署中機杼聲達宵晝入覲費儀惟粗布兩疋家人

紡紆物也署後有隙地種蔬自給即以餘蔬饋士大夫且曰不可

一日不知此味排里供費一切裁省日設兩老人值賓館候薦紳

至迭唱俚語

一老云鄉官不許說人情一老云說來也不聽

互相戒約私干無由啟齒在

任三年水蘖之聲達於遠近祀名宦

府劉志 參程志

喬登字子高河南延津人吏員任典史敢死有義氣嘉靖癸丑倭

寇至登奉檄禦於邑東南之曹家橋所將民兵皆不習戰猝見敵望風逃竄登奮身不顧率其子戰歿於陣祀報功及名宦程志纂

殷廷蘭廣東人嘉靖癸丑進士授嘉興推官廉介端嚴不可干以私每聽斷詳審精密郡無冤獄會署縣事倭猝至僅隔一水時未有城令民無走當為疑兵以却賊於是晝則揚兵夜則列炬舟卒市人聲應若十萬師賊駭遁百姓歡呼相賀廷蘭曰是幸也不可再亟申請築城經畫措置盡得其宜祀報功府志劉志

胡松字茂卿號承菴南直績溪人正德甲戌進士嘉興推官繼殷廷蘭後署縣事時議築城詣幕府曰民難與慮始請縛松置軍禦倭民受松恩情必相急乃可舉事從之不數月城成累官工部尙書府吳志參湧幢小品

平湖縣志

卷三

宦績

文秩

四

劉存義字質夫號漢樓湖廣襄陽人嘉靖癸丑進士甲寅知縣事時邑受倭患尤劇始議城守存義至負土築埤堦成而倭至雉堞屹然倭不能上悉力來攻存義申號令明賞罰擐甲援枹立矢石

下倭見堅守遣酋至城下裸衣跳罵欲激戰手弓射之應弦而倒倭大驚解圍去總督胡宗憲率師數萬屯城中土漢交雜供費億計存義盡心調護卒以用間殲賊沈莊倭既平亂兵慘甚於倭存

義又百方撫戢邑賴以全民為立報功祠并祀名宦程志王志云邑版築始

於癸丑九月迄十二月即竣存義蒞任在甲寅三月舊志懷其城守功遂并移築城事歸美之恐不確

顧廷對字子俞號直齋南直泰州人嘉靖己未進士知縣事遇事敢為辨疑獄洞得其情先是較田多寡以役民民以田為仇廷對創條鞭均徭法總計而年徵之儲於官以貼役者力均而不病上

官初弗之許反覆陳利害十數條始得如請令下民若更生逾年南海龐尙鵬按浙頌其制行之各郡邑在在稱便擢御史祀名宦

一統志

參程志

法暲字雙嶼南直丹徒人邑自建治後百餘年未有志嘉靖癸亥

暲任教諭慨然以文獻爲己責博採省志府志撫拾稗官家乘閱三月書成時稱詳核

宋志參府吳志

丁應賓號紫洲湖廣龍陽人嘉靖乙丑進士知縣事簡潔厚重恤

民養士前知縣顧廷對立條鞭法法行浙中各郡邑廷對去他邑

或稍更張弊復滋應賓一遵約束邑人賴之

府劉志參宋志

趙書字同文號默所南直桐城人歲貢生嘉靖末任訓導

按劉志作教諭

嗜學勤講課諸生餽遺却弗受其甚貧乏至典衣以周之嘗作

平湖縣志

卷三

宦績 文秩

五

明倫十二事以訓士士有篤行誼者輒稱舉爲表儀學道聞而褒

賚之卽以所賚鑄鼎學宮爲銘以見志陞遂昌教諭

府劉志參程志

李實字若虛號虛谷四川瀘州人隆慶辛未進士知縣事究心民

隱搜剔吏蠹有神君之稱獄訟日減諸役無所事事多散去乙亥

夏海溢害稼實周視賑恤安集者數千人邑有把持稅牘積蠹其

中者洞燭之毫不得隱僉徭煩簡各以力任民咸使之祀名宦

府劉志

劉士瑗字允玉號抑亭江西安福人萬曆丁丑進士知縣事性穎

絕凡訟牒文移一覽不忘尤能執持上官批駁不爲動學宮災捐

俸爲倡不旬日告成監司議開金山渠士瑗慮海潮延入內地爲

民患以去就爭乃寢陞刑部主事祀名宦

程志參府袁志王志云萬曆辛巳之役士瑗

縮弓溢額府劉志程志可考本傳從王世貞祠記節出故多溢美稽其政蹟與康熙中倪适相埒惟開渠一事差強人意舊志入名宦今始從之

洪敷文號質所廣西臨桂人解元萬厯己卯署教諭容親修偉為人寬綽大度待諸生有體能容人之短誘人之長不屑屑於科擯而凜乎不可犯陞南直黟縣知縣祀名宦程志

江環字晉雲福建漳浦人萬厯丙戌進士丁亥初夏知縣事是年大水秋無收越戊子己丑歲頻旱大疫殭屍載道斗米二錢環盡心賑恤平糶設粥市棺瘞死者又力請上官緩本年催科至以額虧受訕處之泰然在任不輕動官庫一錢自奉尤淡泊即鮮食亦不恆設云程志參朱志

黃焰字明寰河南商城人萬厯壬辰進士知縣事性愷悌筆楚不平湖縣志

卷三 宦績 文秩

施奸蠹自戢慮差役擾民削木為隸以代追呼民便之庭無留案非大獄一聽自息月課諸生賞識者相繼得售以勞瘁卒於官程志

王義民字若惺南直江陰人萬厯辛丑進士知縣事聰敏洞察民有犯至庭一見不忘每晨視事輒言昨日某人行某事今在某地跡之不爽胥吏畏若神明徵糧僉役曲盡規畫以竹籤註姓名糧額遞催完賦猾吏無所容奸以憂歸府袁志參朱志

林維進字用顯號儒菴福建晉江人舉人萬厯辛丑署教諭事家本閩中大族諸父昆多居顯要而清風挺節泊然有道之容簡諸生十人旦夕論文先後登第者六人知縣王義民雅敬之為建鳳

翥軒程志參朱志

蕭鳴甲字象林湖廣漢陽人萬厯甲辰進士知縣事仁廉明達不

屑煩苛兩造盈廷片言心折戊申霪雨浹旁邑或訪富室待賑  
中人之產無甯居鳴甲歎曰荒未及民先瘠矣下令云賑在官毋  
需民也一邑安堵竟亦有秋遷戶部主事朱志

朱欽相字懋忠號如容江西臨川人萬曆庚戌進士知縣事值編  
審剔釐飛灑虛糧花分詭寄之弊修城舊役里甲吏緣為奸欽相  
請派入條鞭并革櫃收區總縣總等役凡所興除皆務便民癸丑

內艱去初欽相父邦喜為府同知再署縣事有善政欽相繼之邑  
人為立世德祠後擢吏科給事中祀名宦舊浙江通志參朱志

張蔚然字維誠一作號青林仁和人舉人考碑記萬曆間教諭博

核正

極羣書與士子講學不輟邑令縉紳咸就教又有清學基廣科額

增書籍勒題名

按學職題名

碑今無考

諸美蹟積缺任俸百兩議建尊經閣

著有湖蠻政概程志參朱志

羅尚忠字孝可號化城一作南直青陽人萬曆癸丑進士知縣事

為政清簡執法不撓北白南糧陋規洗刷殆盡禁火葬廣置義塚

又捐俸立義田以賑貧民不能具棺槨者賑贍之餘即以備荒孽

畫精到慮民舟苦於供役為置官船代之精於藻鑑所得士俱先

後獲售在任不滿三載以憂去後擢戶科給事中祀名宦程志參朱志

張賡福建晉江人丁酉舉人萬曆間署教諭朴茂肫懇不事矯飾

却修脯絕餽遺同寅貧不能給者分俸給之所獎拔士多登第已

未以憂去弔賻悉謝不受歸橐蕭然程志參朱志

陳鴻烈南直六合人歲貢生萬曆末任督糧丞仁厚清介却常例

不受私謁令有事檄下必力持公道好文博學溫然有儒者風朱志

平湖縣志

卷三 宦績 文秩

陳熙昌字杲菴廣東南海人萬曆丙辰進士知縣事至誠愷悌蒞任六年未嘗妄撻一人士民干法輒霽顏諄諭捐羨金貸贖緩寬徭賦減貼役編審一事最稱弊藪熙昌先清宦田遵定例優免浮者置官圖充役不及額而取寄莊以漁利者盡數還民役田遂溢額四萬二千有奇已未庚申歲連歉饑民聚劫熙昌擒渠魁釋株累平糶賑恤境內帖然擢吏科給事中祀名官

程志參府袁志

魏俊陝西麟遊人萬曆間由選貢生任督糧丞清謹慈祥重道義

好文學任未期冒炎督兌中暑而殞署橐蕭然邑令與鄉先生連

懇上臺給勘合始得以骸骨歸民之號踊執紼者千計

程志

韓炯號宇定奉化人天啟初以歲貢生任訓導冲淡自適好與志

士交諸生貧不能贄者反惠之力却童子贄蔬食水飲陶然也陞

### 平湖縣志

#### 卷三

宦績 文秩

### 分水教諭

朱志

顧國寶字元善號珠巖南直通州人天啟壬戌進士知縣事性剛

介雖政主愛民而務必行其法漕規久弛運軍挾衆善譁國寶力

裁額外加耗又酌立收兌永制先於冬月徵糧輸倉躬自驗閱至

期照船配厥刻日交兌隨兌隨行軍民兩利焉佐貳署向取道儀

門外國寶塞之啟馳道於堂之左自是受詞請謁不得擅有好商

請於鹽使者議設批驗所於邑之西門外國寶力持不可事遂寢

捐俸置義田三年調繁嘉興秩滿擢吏科給事中

程志參府袁志

趙廷柱字肩峩江山人歲貢生天啟中任訓導坦懷朴率質任自

然每與士子接席有汪洋千頃風任數月卒及門哀之

程志

程楷字公式號畸人南直合肥人天啟壬戌進士知縣事折獄平



允催科不迫構三式館與教諭楊雋卿講學論道得法暇邑志稿增修之文獻賴以有稽祀名宦張志

賴咳字宇肩福建德化人崇禎戊辰進士知縣事性貞介人不敢干以私而政務平易爰書讞語飾以經術善藻鑑士習文風翕然

丕變學宮災留羨金以佐鼎新擢翰林院檢討宋志

柴世臯字式穀仁和人舉人崇禎甲戌任教諭博通經術勤課士

嘗率邑人修葺學宮祀名宦名宦實畧纂

陶嘉祉號盟水南直武進人崇禎甲戌進士知縣事一月卒有異

政民思之為立陶公墮淚碑按碑今無考府志

吳春枝字元萼號梅谷南直宜興人崇禎丁丑進士知縣事才敏

而機警徵輸有法不敲朴而輸將恐後尤加意漕政奸弁不敢撓

平湖縣志 卷三 宦績 文秩 九

督漕刊石永為規則歲饑賑恤全活者無算府志

國朝

劉秉鈞字參宇奉天正紅旗人順治辛卯知縣事禮士愛民而性

嚴毅江上有警漕兌囂然秉鈞率家丁彈壓之旗軍不敢額外苛

索民受其賜以世職改武歷任山東登萊總兵宋志

朱之翰字鶴門江南上元人順治丁亥進士知縣事潔已愛民不

妄用官庫一錢故事徵糧用櫃收每勒火耗之翰首行自封自兌

法臨倉供應概行罷免事無大小必躬親案無留牘尤加意鑿拔

士子秩滿去任行李蕭然歷官至河南提學宋志參府吳志受中編之翰清操刻厲

夫人操作以佐其廉機杼之聲聞於堂外

張應麟號振仲鄞縣人舉人順治丙申署教諭性貞介不苟取與

而又和易近人時學宮久圯僦舍而居蕭然布蔬不問餽遺士子  
貧者時捐俸周之振興文教掇巍科者踵相接陞直隸平鄉知縣  
朱志

陶鑄字子固烏程人舉人康熙初任教諭為人和煦不苟嘗笑論  
學宗程朱以孝友訓士士習因之一振祀名宦  
名宦實 畧纂

王召字徵先烏程人康熙六年署教諭以興教率化為已任月課  
生儒品騰不爽重名流恤寒士待下嚴整學宮之體始肅以憂去  
朱志

謝師昌字維賢鎮海人歲貢生康熙二十二年任訓導為學有本  
行文高古警拔生平甘苦未嘗暫釋勤課諸生評隲甲乙不爽銖

黍凡貧而有志者尤加意獎勵以文藝就質者戶外之屨常滿雖  
平湖縣志

卷三 宦績 文秩

修脯不具不計也秩滿得廣東南雄府經歷  
王志作江西布政司 經歷今從蛟川謝氏

家乘更正 自言作吏非所願乃告歸  
受中 編

呂猶龍字爾霖號雨村奉天正紅旗人監生康熙壬申知縣事值  
饑饉後一意撫綏夏旱步禱務虔時出郊野勸農詢民疾苦給酒

米以慰勞且禁絕請託遏抑強暴兇猾不逞者相率屏迹先是徵  
解南糧有貼解浮面諸耗猶龍悉裁去之創橋梁緩催科葺城垣

一切興革百姓盡蒙其福在任四載以憂去邑人樹坊通衢頌曰  
召伯所芟  
按坊今 無考 後為運使道經邑父老遮道相迎慶召父重來

累擢福建浙江巡撫祀名宦  
府吳志 受中編猶龍任湖時年未 滿三十精力強幹嚴於盜賊每夜具 十舟令坊捕巡緝遠鄉撥內丁十人監之及天明則已在縣矣冬 夜三更嘗自乘一驢以毡縛其蹄手攜一小燈遍巡巷陌役人往 往遇之皆盡力不敢怠 數年之中失事甚少

王國英字俊侯奉天正白旗人康熙庚辰知縣事以撫字為主不事催科清操自矢在任五年終始如一去官一邑如失慈母府吳志

董天眷字紫來奉天正黃旗人歲貢生康熙丙戌知縣事以崇儒

重道為己任集諸生學舍給膏火延純儒與講說為政寬平不尚

武健嚴酷遇奸宄蠹胥則必盡法懲之不少貸也邑向無育嬰堂

天眷始建堂六楹捐俸置田為乳哺費活嬰無算後調任錢塘張志

顧之翰江南太倉州人監生康熙壬辰任主簿家本簪纓抵任後

讀書勵節不取民間一錢出入坐一破肩輿自僱腳夫二名昇之

屏去儀從遇事無所忌諱公而且明人稱之為顧青天西野筆談

林緒光字鳳溪號餘齋福建閩縣人舉人康熙辛丑知縣事以清

釐宿蠹為己任公事畢輒與諸生講學論文喜為詩工書育嬰堂

平湖縣志 卷三 宦績 文秩 十一

收嬰向以費不給轉送蘇州緒光捐俸續置田蕩五十餘畝諸嬰

始留育堂中擢員外郎尋以宰湖時錢糧註誤逮下獄總督李衛

辨釋之并疏薦其才未幾任乍浦海防同知建九峯書院延師課

誦士風日上嘗謂安民之本在於戢吏蒞任八載胥吏無敢因緣

為奸者遷雲南永北知府著有獄中吟稿餘齋存稿張志

富紳滿洲正藍旗人筆帖式乾隆丙辰任乍浦理事同知丁巳春

海甯築塘需石移文採乍浦觀陳諸山民情洵懼紳指陳利害密

揭總督嵇曾筠得奉檄永禁陞嚴州知府乍浦志

舒瞻字雲亭號堃畝滿洲鑲黃旗人張志作正白旗誤乾隆己未進士丙

寅由桐鄉調知縣事前宰以苛察為能瞻一反簡靜以文學飾吏

治嘗曰鷹鷂不如鸞鳳民安之工詩品在元白間以憂歸服闋歷

知山陰海鹽等縣署乍浦理事同知卒於海鹽署中著有蘭藻堂集十卷在邑任者曰栢湖詩存

張志參別裁集

鮑鈇字安之號西岡奉天人貢生乾隆丁卯署海防同知清操自

矢吏民安之惜未數月卽去生平工詩文有道腴堂詩正續二十

六卷載興集三卷行世

新纂

閻公銑字惺甫直隸昌黎人乾隆丙辰進士丁卯由嘉興調知縣

事剛正自持廉潔不苟訟至立爲剖決案無留牘尤愛才如命書

院肄業生有一藝之長必鼓勵以成其器凡蒞任五載去之後邑

人思其德而不忘爲設長生祿位於各寺觀今當湖書院中建有

三俊祠春秋致祭焉

新纂

孫右翼字衛如山東鉅野人吏員乾隆丙子任主簿潔己自好縣

平湖縣志

卷三

宦績

文秩

三

委理訟事必先理論而後裁之以法居平鍵戶課子讀書爲詩亦

灑然有致知縣劉純煒深加敬禮知其貧歲分祿米爲助任滿歸

居民至有焚香拈花送之者

王志

李化楠字石亭四川綿竹人乾隆

進士丁丑知縣事前令某

七年積案三千有奇化楠計日定程早午晚決訟各數事縱民觀

聽三月盡理民爲之語曰雲霧七年三月見天嘗言居官有六字

訣眼到身到心到行政以仁愛爲主不輕勾攝日堂上一點硃民

間數點血也其勤慎如此

冷廬雜識纂

劉純煒字仰仲號霽菴山東諸城人乾隆己未進士庚辰由海甯

調知縣事聽訟勤敏凡前任累年未結案牘斷一空民無羈訟

苦邑奸猾挾持短長侵漁里閭廉得其名榜治前罪大者按法流

配之擢杭州府東海防同知歷官順天府府尹張志

周大樞字元木山陰人由舉人教習入旗文名噪都下乾隆辛巳任教諭為人恂恂長者樸懋無文生平研窮經學漢唐以來注疏家言皆能條舉縷析自謂尤邃於易諸生中有篤學好古者稱之不置以愧勵其餘於中才士輒就其所近裁成之或以詩名或以時藝名一時咸慶得師居九年卒於官著有存吾春軒詩集八卷

王志

周昭仔字湘岸湖南湘潭人舉人乾隆丁亥知縣事長軀偉幹性寬厚不嚴責扑不急催科認簡刑清公餘讀書不輟月課諸生恆親加甲乙與教諭周大樞最相得過從講論無間旬日任四年卒

於官王志

平湖縣志

卷三

宦績 文秩

三

王恆字久也號咸齋貴州遵義人乾隆乙酉舉人乙巳由慶元調知縣事值前令廢弛之後清理積年塵案吏不敢欺邑有號小青蛇者窩竊為害恆任未一月即擒治之羣匪皆斂戢是年夏大旱恆力排眾議開通橫橋堰泖水屢挽直達茗溪利被鄰境明年春米價騰貴施粥賑飢時沿海奸民施長七等誘飢民搶掠富室勢甚洶洶恆親率丁役捕首謀盡法懲之餘黨瓦解城南向有陸清獻祠祠後為當湖書院歲久皆傾圮咸捐俸修葺督課諸生其餘纂志瘞骼及城垣祠廟橋梁古蹟次第修舉為當時勤政能事之吏民尸祝之陞江蘇海門廳同知去後陞金華知府未任卒路志  
邱永安字靜齋甘肅綏來縣人官乍浦巡檢司遇有訟事必先理諭而後裁之以法工詩善寫蘭竹得顧定之吳仲圭遺意府志

項慎植順天大興人任典史十餘年清慎有聲嘗典朝衣以供朝夕上官知其廉恆分俸濟之工書得鍾王筆意新纂

李賡芸字生甫號許齋江蘇嘉定人乾隆庚戌進士歷宰孝豐德

清嘉慶丙辰調平湖潔己愛民盡心撫字居官一以陸清獻爲法釐革漕弊殆盡民懷其惠而吏懷其操邑有同善會司事者縛一人送縣賡芸廉知其無罪謂諸司事曰君輩旣名同善會詎宜枉誣良善衆皆駭服一生逋糧甚多限十日完納不數日繳送疑之密詢其錢所自來則對以不忍負公于今晨賣女作妾矣賡芸惻然亟邀買妾者至則頽然老翁也與之坐而論之曰功令不得以士人女作妾今當就汝家爲此女擇一佳耦耳其人感愧卽指一幼孫之未締姻者令婚娶焉尋以治行第一膺卓薦擢同知游陞

平湖縣志

卷三

宦績 文秩

志

嘉興府知府政如其初以憂去服闋再起益勵清廉官終福建布政使閩人爲立遺愛祠平湖東門外慈雲閣亦設主供奉焉賡芸事繼母孝湛深經術詩文亦別開一徑著有稻香吟館集七卷府志

路錚字墨莊湖北漢陽人監生由諸暨調平湖縣性仁厚民有薄譴不忍施以蒲撻亦不至廢法前令王恆輯邑志迄于乾隆己酉錚重修之自庚戌後十五年事賴以無缺凡蒞任六載陞任同知而去府志

毛元坤字補南江山人乾隆甲寅舉人嘉慶丁卯任教諭直己守

道訓諸生務崇實黜華邑人咸樂受業焉新纂

易鳳庭字梧岡廣西桂林人以進士授知縣嘉慶己巳由永康攝

平湖剛明知大體敬禮紳士而不可以私干日坐堂皇凡疑難之獄無不片言立決先是邑中無賴子所在成羣日以鬥毆爲事人患苦之密擒得其魁痛繩以法其黨始散莅任甫及一月令行禁止比去時雖下至販夫走卒莫不太息有泣下者府于志

周鎬字懷西江蘇金匱人舉人由知縣擢嘉興海防同知值海氛未靖羽書絡繹外輯商旅內安士庶民人德之鎬生平宦蹟多在海疆故于防海要務最明與提督李長庚善時長庚勦海匪蔡牽尙未奏功鎬言欲平海寇必先翦其羽翼如李祐降而元濟擒黃佐降而楊太滅此爲上計長庚深然之尤善治農政嘗諭鄉民曰吾家世業農凡耕耘收穫之事無一不知汝輩必不能欺我也詩有才力古文宗法韓歐著有犢山類稿官至福建汀漳龍道府于志

平湖縣志

卷十一

宦績 文秩

五

李宗傳字海帆安徽桐城人嘉慶戊午舉人狀貌豐腴綽有大度癸酉丙子前後兩署縣事廉潔自守遇豪強必痛懲之尤以培植人才爲務榜眼錢福昌爲邑試時所得士訓勉備至其知人鑒如

此新纂

王鳳生字竹嶼安徽婺源人監生父友亮官至通政使以詩文名公卿問鳳生克承家學才復沛然有餘嘉慶甲戌以嘉興通判攝平湖縣事吏治勤敏終日坐堂皇投牒者立爲剖決不稍淹留鄉民咸便之乙亥春大饑海上無業之徒乘勢欲行劫鳳生恩威並用境賴以安邑中飲射讀法保甲諸典廢弛已久鳳生一一行之尤能嚴禁教門優待士子其去也人咸思之官至兩淮鹽運使光

緒己卯祀名宦府于志纂

何太青字藜閣廣東順德人由翰林改知縣歷宰餘杭德清仁和擢嘉興府海防同知所至有能聲愛才若命與士子討論詩文晝夜不倦性慷慨好施戚友有求必應雖一日揮霍千金不惜也道光癸未大水皇然爲斯民畫生計旋丁外艱貧不能支嚴冬風雪身無敝裘賣書籍以易薪米客至不能具茶茗而處之晏然書法得柳意詩亦清新拔俗著有道路吟等集府志

林樹錦佚其字順天大興人道光甲申任主簿清廉自矢不妄取一錢值委理公事時開誠善導之無不情吐其實旋卒於任邑人

助資以歸其櫬新纂

楊遇升後名裕深字曉東貴州平越人道光己丑進士辛卯署縣事爲

政不專於寬而斷獄如老吏能得民心邑人頌其德政曰政惠民

平湖縣志 卷十 宦績 文秩

共

安累官浙江按察使咸豐八年辦軍需事過勞卒於任新纂

趙泰字心蓮錢塘人嘉慶癸酉舉人任訓導文章自出機杼一以

理法爲宗爲人剛正不阿遇諸生有委曲事力周旋之縣署紀綱

之僕攜家屬居戈氏屋戈祇嫠婦及婢兩人屢遭侮虐不得已邀

族諸生某呈一控詞有漕書者慫恿其間誣生以素不安分泰聞

之輒向縣令曰某生卽不安分此其族中事亦分所應爲且內丁

而家居於外如關防何居恆茹素自甘卒之日囊無餘資諸生經

理喪事歸其櫬於里門新纂

朱煌字勿軒直隸青縣人舉人道光丁酉知縣事邑故有豪猾愚

弄良民利其財遇事輒令興訟煌洞悉其情聽訟必根究作俑者

豪猾屏息居官二載胥吏不敢因緣爲奸尤長於弭盜賊四境肅



清後官杭州府知府大吏咸器重之新纂

胡培荃字晴洲河南光州人監生道光庚子知縣事聽訟尙寬和

使民自悟未嘗輕杖壬寅夏英夷寇乍浦城陷土匪乘機肆掠人

情洶洶培荃督勇彈壓置強暴者於法民賴以安迨陞任去攀轅

臥轍不絕於道士民思之於弄珠樓東偏設位祀焉新纂

韋逢甲字毓春山東人道光進士壬寅由安吉調署乍

浦海防同知甫攝篆時海氛甚熾逢甲率義勇沿塘防堵晨夕靡

懈四月初九日禦敵中礮洞左脇不絕其下昇至六度菴越日卒

賜祭葬卹襲如例

勅建五忠祠於省垣逢甲與焉壬寅乍浦殉難錄

龍光甸字見田廣西臨桂人舉人道光癸卯任乍浦海防同知遇

平湖縣志 卷三 宣績 文秩 七

事敢爲不畏強禦嘗慨俗尙奢靡力爲崇實黜華濱海豪民痛懲

不遺餘力乍浦故有九峯書院光甸鼎新之又捐廉修龍湫山人

祠蒞任三載多善舉焉後調玉環同知新纂

許乃裕字敬齋仁和人嘉慶己卯舉人道光癸卯任教諭學問湛

深人品高峻學中故有羅侯義田乃裕以給貧羨餘創爲月朔課

士評文量給膏火力學之士感焉平邑秋闈向無賓興盛舉邑人

胡良佐良俊捐田爲登瀛局公產乃裕贊成之士林至今稱道弗

衰新纂

吳汝霖字時彝建德人道光戊子舉人癸卯任訓導虛懷下士啟

迪有方邑人陸錫智曾任嚴郡教授汝霖親受業焉錫智沒家無

儋石招其孫至署中飲食教誨之善繪事於墨松尤工然不輕下

筆後卒於官新纂

王道明字鶴樵山西文水人咸豐丙辰署白沙巡檢有徐姓女許字金山某貧不能娶偵女他出邀取成婚踰月某偕女歸甯徐痛毆之且訴於署欲絕其婚道明廉知其誣大怒薄懲某而痛責徐其斷事明允如此性廉介嘗曰我閱人多矣貪墨者必不昌且有奇禍民稱其安於義命焉當湖外志

楊炳字子萱江西新城人充實錄館謄錄議敘以布庫大使分發直隸改官浙江知縣歷任繁劇咸豐丁巳署平湖性仁恕平邑歲收漕糧吏每以嚴酷從事炳能卹民隱不事追呼而漕額無缺公餘之暇輒與邑之文人學士飲酒賦詩書院月課制藝之外加以詩賦親爲月旦士林稱之旋署乍浦同知敘海運勞以知府升

平湖縣志

卷三

宦績 文秩

六

用咸豐辛酉杭州陷炳與妾張氏同殉難著有惜味軒詩集十四

卷浙江忠義錄纂

周維楨字片玉江西安福人咸豐辛酉年任乍浦巡檢三月賊犯乍浦駐防殲焉維楨猶招集民團與賊接仗衆寡不敵遂潰維楨力刃數賊創甚大呼殺賊而死得

旨優卹浙江忠義錄

嚴嘉榮字菊泉山陰人道光乙未舉人同治癸亥任教諭其時值粵匪初平文教衰息迺舉行月課優給膏火丹鉛筆削士皆爭自濯磨又以文廟禮樂缺如籌置祭器選取樂舞豆籩籥翟講肄時勤朔望率諸生灑掃廟庭先師誕日行釋奠禮春秋丁祭盡敬盡誠聲容之盛觀者歎明備焉復捐贖田三十餘畝爲禮

樂公產及祭胙之需通詳立案以垂永久壬申銓升本府教授興廢舉墜亦有政聲年七十三卒

新纂

何增榮字子堅蕭山人同治丁卯舉人家貧以筆耕爲業兼擅岐黃青烏術同治壬申任教諭學中月課向以羅租羨餘作膏火增榮增益之嘗曰能令多作一篇文字卽令少作一件壞事也其用心肫切如此生平廉潔自守恆典質以給而對諸生則未嘗言貧

越一年卒

當湖外志纂

平湖縣志

卷十一

宦績

文秩

九

武秩 按前志宦績罕及武秩未免闕畧王志始載數傳茲遠考圖經近徵府志及浙江忠義錄凡軍政嚴明及以死勤事者備著於篇

明

徐榮巢縣籍世襲乍浦所百戶正統癸亥倭寇登岸戰歿 府吳志

彭端海甯衛指揮同知嘉靖丙午倭犯乍浦唐家灣端戍守兵弱

子大年散財募死士助父戰斬倭首七級倭遁 海鹽圖經

滿朝黑山籍世襲海甯衛指揮同知丰儀甚偉負氣節嘉靖癸丑

守梁莊寨倭酋八大王以賊四十二人由金山潛踰梁莊而南朝

所統兵甚少奮勇率千戶王繼隆百戶楊臣康綬追及砂腰村賊

據民家登屋揮旗朝射之殪復有賊從白馬廟突出朝力鬪不支

死繼隆等亦死祀英烈祠 按祠在海鹽海鹽圖經

平湖縣志 卷三 宦績 武秩 三

湯克寬鳳陽人東甌王後裔福建叅將嘉靖癸丑倭擾海上巡撫

王忬奏調守鹽至則簡卒伍嚴號令休兵養士以待方經營間倭

數百突入乍浦卽帥衆往勦賊遁據高公山湯兵鼓噪而登殺賊

四十餘凱還以長矛貫倭級入鹽東門觀者如堵 府劉志參海鹽圖經

王鐘字海山密雲籍世襲乍浦所正千戶持身剛介好讀書馭下

有法一時士卒咸樂爲用嘉靖中乍被倭警鐘益勤簡練百計防

禦歲癸丑倭自鹽寇乍夜圍城會大雨城陷鐘已致仕率其子邦

振分軍巷戰力盡被執不屈罵賊死與鐘同日死者百戶陳綬冠

帶總旗張儒 張志參龍湫集

劉大仲處州人驍勇以忠義自負嘉靖癸丑甲寅問以千總統坑

兵援鹽追賊酋蕭顯由柘林廣陳乍浦屢戰屢勝諸將成功多其

力後從盧鏜追倭于孟家堰遇伏率其黨胡大力連仲吳蠻牛力

戰而歿 海鹽圖經

朱璽嚴州人明百戶嘉靖甲寅五月金山流賊劫農船璽率兵追

之次九里亭中矢裏創進至新豐鎮戰歿祀報功及名宦 路志

王勳世襲指揮使有膽力善射督捕熾航亂矢將及發二矢斃二

人乍浦有悍卒七號七虎請之大府夜詣境擒之 海鹽圖經

彭應時山陰人中武科為鎮撫以充被黜都御史王忬鎮浙檄使

練士會參將盧鏜自松江擊走蕭顯應時截諸乍浦海塘為賊所

掩乃奮鬪被鎗墜馬死性聰敏能詩文材力武技蓋鄉里而馳射

尤妙少年時使氣人不敢忤至是善撫士卒士卒樂為用竟以敗

死 徐文長集

平湖縣志

卷三

宦績 武秩

三

戴大賓劉彥才俱乍浦所世襲百戶嘉靖間勦倭累功陞本衛指

揮僉事死祀胡少保宗憲公祠 九山續補志

徐行健合肥籍世襲海甯衛指揮使素以忠義自許嘉靖丙辰大

艘倭寇登乍浦進犯海鹽行健率兵五百當之倭分其眾一由海

塘一由北王橋腹背夾攻行健力戰斬數寇身被重創死贈官立

廟 海鹽圖經

國朝

黃天寅廣東澄海人武進士雍正甲辰任乍浦水師遊擊恂恂溫

雅有儒將風治兵以嚴肅為主兵有犯法痛懲之不輕革其糧曰

若輩本無賴子利餉而來吾營吾蒞以刑威庶可冀其革面否則

縱而逸且無衣食資其不至於作奸犯科者幾希 漫長善輒勉以

功名故屬弁有仕至提鎮者居五載以疾歸王志

柳進忠福建晉江人雍正戊申任乍浦水師遊擊時奸民奉檄鑿

湯山勢張甚進忠密揭總督李衛請勒石永禁乍賴以安九年改

參將乍浦志

傅森滿洲鑲黃旗人雍正己酉任乍浦水師副都統時新立駐防

營調劑兵民甚有法兵有怙勢虐民者輒痛懲之境內以安後陞

杭州將軍去民焚香遮道送者以千計至今人感之九山續補志

善泰字仲憲滿洲鑲黃旗人康熙間隨征西藏屢著勞績雍正己

酉自杭州移駐乍浦歷官左營右翼協領入

朝陞見疊荷白金蟒服之賜性情恬淡篤好吟咏公退之暇葛衣紉

履乘欵段出遊臞然如山翁澤叟著有草竹軒詩及詩餘雜著若

平湖縣志

卷三 宦績 武秩

三

干卷乍浦備志

薩爾哈岱滿洲正藍旗人雍正庚戌由在京防禦出為乍浦佐領

節廉勁正不可干以私自位偏裨矯矯不與儕偶伍或訕笑之弗

顧也甲寅陞協領擢任本營副都統先是為卒伍時隨征西藏有

功故遷轉甚速既之任朝夕勤訓練嚴約束與將弁士卒言諄諄

勛以廉恥或麗於法懲治無稍貸性能飲始服官即自為節制及

受專閫寄曰吾兵之或至鬪狠者酒也其技擊不精身家不給者

亦酒也欲嚴禁之不可不身先之遂絕酒生平生長軍中未嘗通

漢文公事餘正襟危坐筆帖式及屬弁中有稍知書史者時引與

揖讓俛講論古名臣大畧居官九年遷浙江將軍去去之日滿漢

兵民外至閭廣商旅填街塞巷餞送多有泣下者王志

圖克善滿洲鑲紅旗人乾隆丁丑爲乍浦副都統甫至官適將軍秋期來視師乍營參將助供億資圖愕然曰何與若事旣而俯首爲沈吟狀留數金餘悉却參將喜越明日將軍去以衣物付質庫還所留金參將驚爲同官道之於是羣以爲帥臣中之軒輓海瑞也好讀書旦夕誦經史不輟亦偶及釋老家言惟屏詩歌詞賦弗觀曰是無益於身心政事者持身嚴肅在內署盛暑必冠帶衣多疏布妻子化之未嘗服紈綺任二年以罣誤回京聞

朝命卽日戒途妻子相繼後發僚屬知其貧釀金錢爲道里費亦堅

拒弗受鬻所有衣服器具以行

王志

本智字素齋嘉慶丙辰以副都統鎮乍浦蒞任數年撫馭軍民壹歸渾厚嘗置東門外與字圩田五十餘畝爲滿洲義塚地旗人至

平湖縣志

卷三

宦績

武秩

三

今稱之甲子春奉

特旨召入爲鑾儀使後爲江甯將軍

乍浦備志

陳國棟龍溪人由行伍歷乍浦營參將嘉慶戊午八月在洋攻盜身自捩舵中盜礮死邵大貴本縣人柯介錫鎮海人皆官乍浦營把總大貴以戊午六月攻盜中礮死介錫以癸亥三月緝匪遇盜被戕事皆先後上

聞邀

恩卹如例

路志

長喜字怡亭滿洲鑲黃旗人道光戊戌年任乍浦水師副都統壬寅四月英夷犯乍浦禦敵於葫蘆城受傷急入鎮城投水前鋒校賞阿佈

右營正藍旗

挽之出曠日叱止之卒死於郡城之三塔灣時與

於英夷之難者英登佈

署左營八旗前鋒協領右營鑲藍旗佐領

駐於葫蘆城力戰被

長矛刺死隆福

左營鑲紅旗佐領

駐天尊廟廟火遂突圍出夷眾窮追隆

揮所部先行掣佩刀奮刺數夷力竭自殺部卒得生者四十三人

額特赫

署左營正黃旗佐領右營鑲紅旗防禦

與貴順

右營鑲白旗防禦

設伏天尊廟夷眾

越嶺遂率所部火器齊發夷多傷勢將北去唐灣山別隊夷兵乘

勝過此夷舶援亦至縱火交攻俱受創死伊勒哈畚

左營正藍旗驍騎校最

善射觀山轉戰時伏林中以手弩殪夷甚眾矢盡為夷所執被磔

死根順

左營鑲藍旗驍騎校

迎戰於觀山灣中礮死該杭阿

右營正藍旗驍騎校

守北

門城陷有勸其摘去頂帽以竄者叱曰可廢

朝廷責守而求苟活耶卒不去遂及於難事上

聞自英登佈以下蒙

平胡縣志

卷三

宦績

武秩

五

恩賜卹襲如例

壬寅乍浦殉難錄

韓大榮字耀峯邑人乍浦水師右營把總道光壬寅夷犯乍浦大

榮守觀山牛角尖寨地當極衝被刃去指猶戀戰中火槍死

恩賜卹襲如例

壬寅乍浦殉難錄

錫齡阿字松亭蒙古正白旗人咸豐己未由荊州副都統調署乍

浦時浙省餉絀錫拊循曲至頗得軍士心庚申賊陷嘉興錫遣將

統兵進扼平湖賊不敢犯適忠逆自滬敗回遣別將擾平湖城陷

將士多死乍城遂孤嗣後米興朝奉檄守湖賊攻之急錫復遣兵

援應圍立解賊陷海鹽錫又會師復之餉久不給出私蓄銀二千

兩分給旗兵士咸感奮土匪乘警劫掠錫親自搜捕梟盜首五人

民始安辛酉三月初九日嘉興賊由海鹽突至錫督所部力戰於



惹山東寨相持甚久殺賊無算適海潮未至賊由塘外長驅而東繞出我軍之後勢益張而客軍有通賊者導之登城錫大呼殺賊數十因眾寡不敵遂中銃而歿城遂陷闔營士卒婦女無一降賊者忠義爲七邑最事

聞

上震悼賜諡武烈並

勅建祠其妻胡札爾氏暨幼女先縊子榮祿伏劍死榮耀巷戰死

新纂

黃金友字益亭湖南人初從軍廣西轉戰湖北江西安徽積功至直隸遊擊補用副將

賜勇號金友躬犯矢石創徧體其膽智尤絕人咸豐庚申與己革提督米

興朝軍浙江之平湖賊屢犯境擊却之辛酉春賊間道破乍浦遂

平湖縣志

卷三

宦績 武秩

三

據之急攻平湖戰不利米興朝退保金山衛江蘇巡撫薛煥奏留

金友營金山之張堰賊勢方熾四月東畧姚廊將窺金山紳士盧

道昌吳履輝率民兵禦之戰少卻金友馳援大破之遂平新倉賊

壘賊氣奪以前功升總兵會平湖知縣汪元祥乞師規復平湖金

友壯之卽請提督曾秉忠總兵滕嗣林分兵協攻并檄華亭奉賢

金山各團軍爲援而自率所部先進嗣林故持重以分兵非計而

秉忠壯其勇撥水師四十艘遣弟遊擊守忠赴之團軍皆來會軍

大振金友以五月朔誓師進駐平湖之廣陳元祥率民兵迎勞請

爲鄉導賊連營二十里一鼓破之賊計窮傾巢與嘉興援賊會分

道襲我軍出四里橋間道見有備不戰退金友迎戰於十字街戰

方酣發火箭賊披靡援賊大集相持久金友右脇被鎗猶誓死戰

士皆奮呼無不一當百會守忠以水師與團軍夾擊賊始卻而金友創發不能騎從子海樓昇登舟至明珠菴卒薛煥聞於

朝以提督例

賜卹是役也有姦民張桂林實通賊聞元祥乞師卽輸情焉賊命桂林擇

廣陳要道敗屋中伏火鎗傷金友後二年賊敗竄桂林已前死

江浙

忠義錄

覃聯陞字輔堂四川雲陽人隸鮑超軍復漢陽武昌又復青陽石埭功多同治元年秋江蘇巡撫李鴻章調防剿奉賢金山克復金山衛城功多二年正月統領浦東防務時賊踞平湖乍浦謀大舉東下二月初七日突至新倉勢張甚諸生朱斯煌急走衛城報聯陞已檄張堰別將會剿賊開濠築東西營功將半矣初九日斯煌又奔告聯陞整部出營明日昧爽至金四孃橋分兵截乍浦之賊留三百人守大營而北趨新倉圍賊營先攻西營破之旋折而東聯陞拔戟當先躍馬至秦橋下忽中一銃墜馬部下請退厲聲曰奈何以一人廢大事今解圍去賊明日復來民無噍類矣不翦滅此吾死不瞑言訖遂絕衆感之益出死力張堰別將兵亦至然巨礮轟破東營轉戰而前焚賊船三百生禽五百斬首無算賊自是不敢復東聯陞積功至副將大吏上其死事於

朝得旨以總兵例

賜卹

浙江忠義錄

平湖縣志

卷三

宦績

武秩

三